



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Distritál Oe-Cusse
Dezembu 2014

**Sumariu prosesu julgamentu kazu iha Tribunál Distritál Oe-Cusse –
Periódú Dezembu 2014**

Introdusaun

Iha Dezembu 2014, Tribunál sira hotu tama ba feriadu judisiál durante fulan ida nia laran hahu hosi 15 Dezembu to iha 15 Janeiru 2015.

Iha periódú ne'e JSMP konsege monitoriza kazu 11 hosi total kazu 21 ne'ebé julga iha tribunál refere. Hosi kazu 21 ne'ebé tribunál marka ona agenda atu prosesu, iha kazu balun tribunál adia no balun tribunál notifika deit desizaun ba parte sira sein hala'o audiensia julgamentu.

Hosi kazu 11 ne'ebé JSMP observa involve kazu krime ofensa ba integridade fízika simples ho natureza violénsia doméstika 7, krime la halo tuir obrigasaun alimentár 1, danu simples 1, explorasaun ba jogu ilísitu 1 no kondusaun sem karta 1.

Entre kazu 11 ne'e, tribunál konklui hotu ona nia prosesu ho rezultadu kazu 4 kondena ho pena multa kazu 5 hetan pena suspensaun, kazu 1 omologa no kazu 1 absolve.

Tuir mai deskripsaun sumáriu julgamentu kazu kompletu:

**1. Kazu krime ofensa ba integridade fízika simples ho natureza violénsia doméstika - Nú.
Prosesu: 237/krime/2014/TDO**

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Jose Elu
Defeza	: Dr. Calisto Tout
Konkluzau	: Kondena ho pena multa US\$45,00

Iha 01 Dezembu 2014, Tribunál Distritál Oe-Cusse hala'o prosesu julgamentu ba kazu ofensa ba integridade fízika simples ne'ebé involve arguida TQ hasoru CS ne'ebé nu'udar nia laen. Kazu ne'e akontese iha 03 Maiu 2011, iha Sub-distritu Pante-Makassar, Distritu Oe-Cusse.

Ministériu Públiku akuza katak iha 03 Maiu 2011, arguida tuku dala ida iha lezadu nia rentos, tebe dala ida iha ain kabun sorin loos no baku dala ida iha lezadu nia liman fuan loos. Aktu ne'e rezulta lezadu sofre moras iha nia ain kabun, rentos no liman fuan.

Kazu ne'e akontese tanba lezadu tuur hamutuk ho feto ida ne'ebé agora nu'udar nia feen segundu iha pontekais Oebau no finze la rona wainhira arguida bolu. Tanba ne'e mak halo arguida laran moras no baku lezadu.

Ministériu Públiku akuza arguida kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguida konfesa no rekoñese katak nia komete duni krime hasoru lezadu no deklara katak nia arrepende.

Iha alegasaun finál, ministériu públiku husu ba tribunál atu aplika pena multa ne'ebé adekuadu no justu ba arguida tanba arguida provadu komete krime hasoru lezadu.

Entretantu parte defeza husu ba tribunál atu aplika pena ne'ebé adekuadu bazeia ba sirkunstansia atenuante sira hanesan arguida kolabora diak ho tribunál, konfesa no arrepende ninia hahalok.

Tribunál konklui prosesu ne'e no kondena arguida ho pena multa US\$45,00 ne'ebé sei selu US\$1,00 kada loron durante loron 45 nia laran. Tribunál mós aplika pena alternativa atu durante loron 30 iha prizaun kuandu arguida la kumpri pena multa refere.

2. Kazu krime lahalo tuir obrigasaun alimentár - Nú. Prosesu : 236/krime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Jose Elu
Defeza	: Dr. Calisto Tout
Konkluzau	: Omologo

Iha 01 Dezembru 2014, Tribunál Distritál Oe-Cusse hala'o prosesu julgamentu ba kazu krime lahalo tuir obrigasaun alimentár ne'ebé involve arguidu CS hasoru lezada nain rua TQ nu'udar nia feen no VS nu'udar arguidu nia oan. Kazu ne'e akontese iha 26 Agostu 2011, iha Suku Costa Sub-Distritu Pante-Makassar Distritu Oe-Cusse.

Ministériu Públiku akuza katak iha 26 Agostu 2011 to'o agora, arguidu la sustenta nia oan. Tanba ne'e, lezada sira abdonadu no sofre terus. Kazu ne'e akontese tanba arguidu la-iha servisu.

Ministériu Públiku akuza arguidu kontra artigu 225 Kódigu Penál kona-ba la-halo tuir obrigasaun alimentár.

Iha audiensia julgamentu arguidu konfesa faktu sira ne'ebe akuza ba nia no deklara katak nia arrepende ninia hahalok. Iha parte seluk lezada TQ nu'udar lezadu nia inan husu ba tribunál atu

deziste tiha prosesu ne'e.

Bazeia pedidu dezistencia no akordu ne'ebe sira halo, iha alegasaun finál ministériu públiku husu ba tribunál atu omologa prosesu ne'e. Alende ne'e, defeza mós aseita ho alegasaun hosi ministériu públiku nian.

Depois rona tiha alegasaun finál hosi parte sira, tribunál konklui prosesu ne'e no omologa arguidu. Aleinde ne'e, tribunál mós katak tanba lezada TQ (arguidu nia feen) agora daudaun iha servisu.

3. Kazu ofensa ba integridade fízika simples ho natureza violénsia doméstika-Nú. Prosesu: 214/krime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Jose Elu
Defeza	: Dr. Calisto Tout
Konkluzau	: Kondena ho pena prizaun fulan 9 suspende ba tinan 1.

Iha 02 Dezembru 2014, Tribunál Distritál Oe-Cusse hala'o prosesu julgamentu ba kazu krime ofensa ba integridade fízika simples ne'ebé involve arguidu PC hasoru JT nu'udar arguidu nia feen. Kazu ne'e akontese iha 10 Jullu 2014, iha Sub-Distritu Pante Makassar, Distritu Oe-Cusse.

Ministériu Públiku akuza katak iha 10 Jullu 2014, arguidu basa dala ida iha lezada nia hasan no tebe dala ida iha lezada nia kelen loos. Aktu ne'e rezulta lezada sofre moras no bubu iha hasan no kelen. Kazu ne'e akontese tanba lezada ho arguidu istoria malu kona-ba osan.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha audiénsia julgamentu arguidu konfesa no rekoñese faktu sira ne'ebé ministériu públiku akuza ba nia no deklarata katak nia arrepente ninia hahalok.

Tanba arguidu konfesa katak nia komete duni krime hasoru nia feen, nune'e iha alegasaun finál, ministériu públiku husu ba tribunál atu aplika pena prizaun fulan 6 suspende ba tinan 1. Entretantu defeza husu ba tribunál atu aplika pena ne'ebé adekuaudu ba arguidu.

Depois rona tiha alegasaun finál, tribunál avalia no konklui prosesu ne'e no kondena arguidu ho pena prizaun fulan 9 suspende ba tinan 1.

4. Kazu krime danu simples - Nú. Prosesu : 211/krime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Ambrosio R. Freitas, Dr. Jose Elu

Defeza : Dr. Calisto Tout
Konkluzau : Absolve

Iha 02 Dezembru 2014, Tribunál Distritál Oe-Cusse hala'o prosesu julgamentu ba kazu krime danu simples ho ajenda rona depoimentu hosi testemuña. Kazu ne'e involve arguidu MT hasoru lezadu JN iha 29 Maiu 2014, iha Aldeia Noque, Suku Naimeco, Sub-distritu Pante-Makassar, Distritu Oe-Cusse.

Ministériu Públiku akuza katak iha 29 Maiu 2014, arguidu lasu lezadu nia karau inan ida iha kakorok no liu-tiha loron tolu karau refere mate. Aktu ne'e rezulta lezadu hetan prejuizu maisumenus US\$450,00 ne'ebé serve hanesan karau nia folin.

Ministériu Públiku akuza arguidu kontra artigu 258 Kódigu Penál kona-ba danu simples.

Iha julgamentu antes, arguidu nega faktus ne'ebé ministériu públiku akuza hasoru nia no lezadu mós deklara katak nia la hare ho matan katak arguidu mak lasu nia karau. Lezadu rona deit informasaun hosi testemuña AC katak arguidu mak lasu lezadu nia karau tanba testemuña ne'e hare hosi tali ne'ebé uza hodi lasu.

Testemuña AC depoimenta katak nia mós la hare ho matan maibe nia diskunfia arguidu mak lasu mate lezadu nia karau tanba antes ne'e nia ho arguidu mak hamutuk lasu uluk karau iha sira nia to'os. Testemuña ne'e hatutan katak wainhira lezadu nia karau mate, nia ba hare tali ne'ebé uza hodi lasu karau refere no diskunfia katak tali ne'e arguidu nian.

Iha alegasaun finál, ministériu públiku husu ba tribunál atu aplika pena ne'ebé justu ba arguidu. Entretantu defeza husu ba tribunál atu absolve arguidu hosi akuzasaun ministériu públiku.

Depois rona tiha alegasaun finál, tribunál konklui prosesu ne'e no absolve arguidu hosi aktu krime ne'e.

5. Kazu krime ofensa ba integridade fízika simples ho natureza violénsia doméstika - Nú. Prosesu : 232/krime/2014/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio R. Freitas
Defeza : Dr. Calisto Tout
Konkluzau : Kondena ho pena prizaun fulan 6 suspende ba tinan 1 fulan 6

Iha 02 Dezembru 2014, Tribunál Distritál Oe-Cusse hala'o prosesu julgamentu ba kazu ofensa ba integridade fízika simples ne'ebé involve arguidu CA hasoru MFS nu'udar arguidu nia feen.

Kazu ne'e akontese iha 21 Maiu 2014, iha Sub-distritu, Pante Makassar, Distritu Oe-Cusse.

Ministériu Públiku akuza katak iha 21 Maiu 2014, arguidu tebe dala rua iha lezada nia kanotak sorin loos no buti lezada nia kakorok. Aktu ne'e rezulta lezada sofre moras iha kanotak no kakorok. Kazu ne'e akontese tanba lezada la aseita arguidu mai Dili, nune'e sira diskuti malu no arguidu komete krime refere hasoru lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa no rekoñese hotu faktu sira ne'ebe akuza ba nia no deklara katak nia arrepende ba ninia hahalok.

Tanba arguidu konfesa no rekoñese ba ninia hahalok, tanba ne'e iha alegasaun finál, ministériu públiku husu ba tribunál atu aplika pena prizaun fulan 6 suspende ba tinan 1. Entretantu defeza husu ba tribunál atu aplika pena ne'ebé adekuaudu tuir arguidu nia kulpa tanba arguidu hatudu nia arrependimentu, konfesa no rekoñese ninia hahalok no kolabora diak ho tribunál. Aleinde ne'e sira iha oan nain 1 no dame malu ona.

Depois avalia ba provas hotu, tribunál konklui prosesu ne'e no kondena arguidu ho pena prizaun fulan 6 suspende ba tinan 1 fulan 6.

6. Kazu krime ofensa ba integridade fízika simples ho natureza violénsia doméstika - Nú. Prosesu : 244/krime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Ambrosio R. Freitas
Defeza	: Dr. Calisto Tout
Konkluzau	: Kondena ho pena prizaun fulan 9 suspende ba tinan 1

Iha 03 Dezembru 2014, Tribunál Distritál Oe-Cusse julga arguidu MFC ne'ebé komete krime ofensa ba integridade fízika simples hasoru SN nu'udar nia feen. Kazu ne'e akontese iha 07 Setembru 2014, iha Sub-Distritu Pante Makasar, Distritu Oe-Cusse.

Ministériu Públiku akuza katak iha 07 Setembru 2014, arguidu tuku dala haat iha lezada nia kotuk laran no dala ida iha lezada nia inus. Aktu ne'e rezulta lezada sofre moras iha kotuk laran no ran sai hosi inus. Kazu ne'e akontese tanba lezada la tau matan ba sira nia oan ne'ebé sei ki'ik no tanba lezada ba joga bingo iha viziñu sira nia uma.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa hotu faktu sira ne'ebé ministériu públiku akuza ba nia

no deklara katak nia arepende ninia hahalok.

Iha alegasaun finál ministériu públiku husu ba tribunál atu kondena pena prizaun tinan 1 suspende ba tinan 1 fulan 6. Entretantu defeza husu ba tribunál atu aplika pena tuir arguidu nia sala tanba arguidu kolabora diak ho tribunál no arguidu no lezada dame malu ona.

Depois avalia ba provas hotu, tribunál konklui kedas prosesu kazu ne'e no kondena arguidu ho pena prizaun fulan 9 suspende ba tinan 1.

7. Kazu krime ofensa ba integridade fízika simples ho natureza violénsia doméstika - Nú. Prosesu : 245/crime/2014/TDO

Kompozisaun Tribunál	: Singulár
Juí	: Dr. João Ribeiro
Ministériu Públiku	: Dr. Ambrosio R. Freitas
Defeza	: Dr. Calisto Tout
Konkluzaan	: Kondena ho pena prizaun tinan 1 suspende ba tinan 1 fulan 6

Iha 03 Dezembru 2014, Tribunál Distritál Oe-Cusse julga arguidu YC ne'ebé komete krime ofensa ba integridade fízika simples hasoru AA nu'udar nia feen. Kazu ne'e akontese iha 21 Setembru 2014, iha Sub-distritu Pante Makassar, Distritu Oe-Cusse.

Ministériu Públiku akuza katak iha 21 Setembru 2014, arguidu basa dala ida iha lezada nia hasan los no silu lezada nia liman, dada lezada nia fuuk to'o lezada monu ba rai. Aktu hirak ne'e rezulta lezada sofre moras no hasan bubu.

Aktu ne'e akontese tanba arguidu la satisfas ho lezada konta fali arguidu nia inan nia hahalok iha momentu festa kazamentu ba arguidu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa faktu sira ne'ebé akuza ba nia no deklara katak nia arrepende ninia hahalok ne'ebé nia komete hasoru nia feen.

Iha alegasaun finál ministériu públiku husu ba tribunál atu aplika pena prizaun tinan 1 suspende ba tinan 1 tanba arguidu konfesa no rekoñese katak nia komete duni krime ne'e.

Entretantu defeza husu ba tribunál atu aplika pena ne'ebé adekuaudu tuir arguidu sala tanba arguidu konfesa no rekoñese katak nia komete duni krime hasoru nia feen, arepende nia hahalok, no iha kolaborasaun diak ho tribunál.

Depois rona tiha alegasaun finál, tribunál konklui prosesu prosesu ne'e no kondena arguidu ho pena prizaun tinan 1 suspende ba tinan 1 fulan 6.

8. Kazu krime ofensa ba integridade fízika simples ho natureza violénsia doméstika - Nú. Prosesu : 247/krime/2014/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio R. Freitas
Defeza : Dr. Calisto Tout
Konkluzau : Kondena ho pena multa US\$90,00

Iha 03 Dezembru 2014, Tribunál Distritál Oe-Cusse julga arguidu AC ne'ebé komete krime ofensa ba integridade fízika simples hasoru BS nu'udar nia feen. Kazu ne'e akontese iha 04 Setembru 2014, iha Sub-distritu Pante Makassar, Distritu Oe-Cusse.

Ministériu Públiku akuza katak iha 04 Setembru 2014, arguidu lori ai bebak matak ida baku dala ida iha lezada nia ain kabun karuk no halo lezada sente moras. Kazu ne'e akontese tanba lezada koalia barak wainhira arguidu haruka lezada kontaktu matan dok atu lori aimoruk mai kura arguidu ne'ebé moras hela.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa no rekoñese faktu sira ne'ebe akuza ba nia no deklarata katak nia arrepende nia hahalok.

Iha alegasaun finál ministériu públiku husu ba tribunál aplika pena multa US\$ 90,00 ne'ebé sei selu US\$1,00 kada loron, tanba faktus ne'ebé haktuir iha akuzasaun provadu hotu.

Entretantu defeza husu ba tribunál atu aplika pena ne'ebé adekua ba arguidu tanba arguidu konfesa no rekoñese katak nia komete duni krime ne'e, arrepende nia hahalok, kolabora diak ho tribunál no sira dame malu ona no to'o agora laiha problema entre sira.

Tribunál konklui prosesu ne'e no kondena arguidu ho pena multa US\$90,00 ne'ebé sei selu US\$1,00 kada loron durante loron 90. Aleinde ne'e, tribunál kondena pena alternativa durante loron 60 prizaun kuandu arguidu la selu pena multa refere.

9. Kazu krime explorasaun ba jogu ilísitu - Nú. Prosesu : 220/krime/2014/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio R. Freitas
Defeza : Dr. Calisto Tout
Konkluzau : Kondena ho pena multa US\$60,00

Iha 03 Dezembru 2014, Tribunál Distritál Oe-Cusse julga arguidu ML, LM no MS ne'ebé komete krime explorasaun ba jogu ilísitu. Kazu ne'e akontese iha 31 Outubru 2013, iha Merkadu Pune, Sub-distritu Oe-Silo, Distritu Oe-Cusse.

Ministériu Públiku akuza katak iha 31 Outubru 2013, polísia halo pasa revista ba iha fatin jogus illegal no kaptura arguidu ML no LM ne'ebé joga hela karta tahan hitu no arguidu MS joga hela kuru-kuru iha fatin hanesan.

Iha prosesu julgamentu arguidu sira konfesa no rekoñese faktu sira ne'e no deklarara katak sira arrepende sira nia hahalok.

Ministériu Públiku akuza arguidu sira kontra artigu 322 Kódigu Penál kona-ba explorasaun ba jogu ilísitu.

Iha alegasaun finál ministériu públiku husu ba tribunál atu aplika pena prizaun fulan 4 suspende ba fulan 4 ba kada arguidu tanba arguidu sira konfesa sira ninia hahalok.

Entretantu defeza husu ba tribunál atu aplika pena ne'ebé adekuaudu ba arguidu nain 3 tuir idak-idak nia sala. Aleinde ne'e defeza husu atu tribunál tetu sirkunstansia atenuantes hosi arguidu sira katak sira konfesa no arrepende ba sira ninia hahalok no kolabora diak ho tribunál.

Depois rona alegasaun finál, tribunál konklui prosesu kazu ne'e no kondena arguidu ML, LM ho pena multa US\$45,00 ba kada arguidu ne'ebé sei selu US\$1,00 kada loraun durante loraun 45. Tribunál mós aplika pena alternativa durante loraun 30 prizaun kuandu arguidu sira la selu pena multa refere.

Enkuantu ba arguidu MS tribunál kondena ho pena multa US\$60,00 ne'ebé kada loraun selu US\$1,00 durante loraun 60. Tribunál mós aplika pena alternativa loraun 40 prizaun kuandu arguidu la selu pena multa refere.

10. Kazu krime ofensa ba integridade fízika simples ho natureza violénsia doméstika - Nú. Prosesu : 248/krime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Ambrosio R. Freitas
Defeza	: Dr. Calisto Tout
Konkluzau	: Kondena ho pena prizaun fulan 6 suspende ba tinan 1

Iha 03 Dezembru 2014, Tribunál Distritál Oe-Cusse hala'o prosesu julgamentu ba kazu krime ofensa ba integridade fízika simples ne'ebé involve arguidu BF hasoru BS ne'ebé nu'udar arguidu nia feen. Kazu ne'e akontese iha 07 Outubru 2014, iha Sub-distritu Pante Makasar, Distritu Oe-Cusse.

Ministériu Públiku akuza katak iha 07 Outubru 2014, arguidu tebe dala ho maka'as dala ida iha lezada nia kidan sorin loos no rezulta lezada sofre moras iha kidan. Kazu ne'e akontese tanba lezada fila hosi cek osan "*bolsa da mãe*" iha Ministériu Solidariedade Sosial Distritu Oe-Cusse to'o uma arguidu lanu hela no baku lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa no rekoñese faktu sira ne'ebé ministériu públiku akuza ba nia no deklara katak nia arrepende ninia hahalok.

Iha alegasaun finál ministériu públiku husu ba tribunál atu aplika pena prizaun tinan 1 suspende ba tinan 1 fulan 6. Entretantu defeza argumenta katak arguidu konfesa no arrepende ninia hahalok. Aleinde ne'e arguidu kolabora diak ho tribunál no sira dame malu ona. Tanba ne'e husu ba tribunál atu aplika pena ne'ebé adekuadu tuir arguidu nia sala.

Bazeia ba faktu hirak ne'e, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

11. Kazu krime kondusaun sem karta - Nú. Prosesu Sumáriu: 08/krime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Ambrosio R. Freitas
Defeza	: Dr. Calisto Tout
Konkluzau	: Kondena ho pena multa US\$75,00

Iha 12 Dezembru 2014, Tribunál Distritál Oe-Cusse hala'o prosesu julgamentu ba kazu krime kondusaun sem karta ne'ebé involve arguidu JB. Kazu ne'e akontese iha 10 Dezembru 2014, iha Suco Costa Sub-distritu Pante Makassar, Distritu Oe-Cusse.

Ministériu Públiku akuza katak iha 10 Dezembru 2014, arguidu kondus motor sem karta kondusaun iha dalan publiku no wainhira liu hosi diresaun Padimau - Numbei, Unidade Tranzitu PNTL Distritu Baucau halo pasa revista ba motor hotu no deskobre katak arguidu laiha karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sem karta.

Iha prosesu julgamentu arguidu konfesa no rekoñese katak nia laiha karta kondusaun duni wainhira kondus motor no deklara katak nia arrepende nia hahalok.

Iha alegasaun finál ministériu públiku husu atu tribunál aplika pena multa ba arguidu. Entertantu defeza husu ba tribunál atu aplika pena ne'ebé justu tuir sirkunstansia atenuantes sira ne'ebé produz durante julgamentu.

Tribunál konklui prosesu ne'e no kondena arguidu ho pena multa US\$75,00 ne'ebé sei selu US\$1,00 kada loron durante loron 75. Tribunál mós aplika pena alternativa durante loron 50 iha prizaun kuandu arguidu la selu pena multa refere.

Sumariu kazu ida ne'e bele imprimi tan ho apoiu jenerozu husi povu Amerikanu liu husi Ajensia Estados Unidos ba Dezenvolvimentu Internasionál (USAID) bazeia ba Akordu Kooperasaun ho Númeru AID-486-A-13-00007 ba programa Ba Distrito iha Timor-Leste, ne'ebe nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoin iha komunikadu impresna ida ne'e nia laran no la nesesariamente refleta USAID ka Governu Estados Unidos Amerikanu nia opiniaun".

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPTl